

ՀԻՇԱՏԱԿՆԵՐ ԳԵՒՈՐԳՅԱՆ ՃԵՄԱՐԱՆԻՑ

Առաջիկա տարում լրանալու է Գևորգյան հոգևոր ճեմարանի հիմնադրման 140-րդ տարելիցը: Հանրահայտ է այն վիթխարի դերը, որ խաղացել է ճեմարանը ԺԹ՝ դարավերջի և հաջորդ դարասկզբի հայ մտավոր կյանքում, հասարակական-քաղաքական, եկեղեցական-հոգևոր, մանկավարժական ու մշակութային ասպարեզներում: Ճիշտ է նկատել ժամանակակիցը, երբ գրում է. «Ս. Էջմիածնի Գևորգյան հոգևոր ճեմարանի գոյությունը Հայոց երկրի սրտում պատմական մի մեծ շարժման նախակարգավորն էր: Իր մեծ հիմնադրի՝ Գևորգ Դ.-ի էական նպատակն էր նղած՝ տալ ուսում և գիտություն իր ժողովրդին»¹:

Թեև այդ դերի մասին բավականաչափ գրվել է², սակայն հատուկնետ են ճեմարանի սկզբնական գործունեության վերաբերյալ հուշագրություններն ու վկայությունները: Այդ իմաստով բացառիկ արժեք է ներկայացնում ճեմարանի առաջին շրջանի սան, հետագայում հայտնի եկեղեցական գործիչ, հայագետ Տիրայր արքեպ. Տեր-Հովհաննիսյանի (Տիգրան Մելիք-Մուշկամբարյան, 1867-1956)³ հուշերը Նիկողայոս Ադոնցի և Գևորգյան ճեմարանի մասին: Հուշերը, որ գրված են 1942 թվականի ամռանը և, ցավոք, մնացել են անավարտ, վերաբերում են Ադոնցի ճեմարանական առաջին տարվա (1882 թ.) և հատկապես ուսանողական տարիների (1894-1896 թթ.) իրադարձություններին: Բարեբախտաբար, հուշագրողը, լինելով լայն հետաքրքրությունների տեր անձնավորություն, հաճախ է հնաանում իր նշանակետ անձնավորության մասին հուշեր, տպավորություններ պատմելուց և դիմում է համեմատությունների, ժամանակի հուզող այլ խնդիրների: Տվյալ դեպքում Տիրայր Սրբազանը լայնորեն ու մանրամասն անդրադառնում է ճեմարանական մթնոլորտին, ուսման դրվածքին, մանկավարժների բնույթագրին՝ մի խոսքով այն ամենին, ինչը ճեմարանը ներկայացնում են ճեմարան, որի մի մասնիկն է եղել իրեն հետաքրքրող անձը՝ Ն. Ադոնցը: Հուսով ենք, որ սույն հրապարակումը կօգնի ոչ միայն Ն. Ադոնցի կենսագրության՝ առաջօր անհայտ մնացած շատ էջերի բացահայտմանը, այլ նաև Գևորգյան ճեմարանի սկզբնական շրջանի գործունեության վերաբերյալ առավել ամբողջական ու վավերական պատկերացում կազմելուն:

Հուշերը հրապարակվում են ինքնագրի հիման վրա, որը պահվում է Ե. Չարենցի անվ. Գրականության և արվեստի թանգարանում (Տիրայր արքեպ. Տեր-Հովհաննիսյանի ֆոնդ, N 45 գ.): Այն գրված է 100 փոքրադիր թերթիկների վրա (չափսը 14×22): Բնագիրը դժվարությամբ է, առկա են ջնջված առանձին բառեր և նախադասություններ, որոշ հատվածներ ստիպված ենք եղել ուղղակի վերծանել: Հուշերը հրապարակելիս կատարել ենք ուղղագրական և կետադրական անհրաժեշտ միջամտություններ: Մեր կողմից ավելացված, լրացված բառերը վերցված են փակագծերի մեջ:

ՊԵՏՐՈՍ Հ. ՀՈՎՀԱՆՆԻՍՅԱՆ

¹ Տե՛ս «Էջմիածին», 2004, ԺԱ.-ԺԲ., էջ 111-112:

² Մասնավորապես տե՛ս «Նշանավոր ճեմարանականներ», պրակ Ա.-Բ., Ս. Էջմիածին, 2005, 2009:

³ Տիրայր արքեպ. Տեր-Հովհաննիսյանի մասին տե՛ս «Էջմիածին», 1956, Զ., էջ 24, 2004, ԺԱ.-ԺԲ., էջ 106-110: Տե՛ս նաև Պ. Հ. Հովհաննիսյան, Տիրայր արքեպ. Տեր-Հովհաննիսյան (1867-1956), «Գևորգյան ճեմարանի նշանավոր սաները», պրակ. Բ., Ս. Էջմիածին, 2009, էջ 443-448:

ՏԻՐԱՅՐ ԱՐՔԵՊԻՍԿՈՊՈՍ ՏԵՐ-ՀՈՎՀԱՆՆԻՍՅԱՆ

ՆԻԿՈՂԱՅՈՍ ԳԵՈՐԳՅԱՆ ԱԴՈՆՑ

(1873-1942)¹

ՀՈՒՇԵՐ ԻՐ ՄԱՍԻՆ

Անգլիական գրականության մեծ դեմքերից Viscount F. Alans Bacon, ընդհանուր անունով ճանաչված իբրեւ Lord Bacon², անգլիական թագուհիներից ամենից խստապահանջ Եղիսաբեթի օրերին³ ապրող (1560-1626 թթ.)⁴, որին են համարում Հեքսպիրի անունով Հայտնի ընդարձակ երկերի բուն հեղինակը, իր «Գեղեցիկ ասացվածքներ»՝ «Ornamenta rationalia» անունով Հայտնի, մտքի ու խոհերի թուխքի վայրկյանների գրչի խաղերից մեկի մեջ ասում է. «Homo toties moritur quoties amittit suos», այսինքն՝ «Մարդ այնքան հաճախակի է մեռնում, որչափ հաճախակի յուր բարեկամներին է կորցնում»:

Այդ զգացումն ունեցա եւ ես, երբ ստացա բարեկամիս գրած նամակը, որը գուժով էր. «Մարտելից ստացված հեռագիրը հաղորդում է, թե պրոֆեսոր Ն. Ադոնցը վախճանված է»⁵:

Գիտեի Ադոնցի վիճակը, նեղ դրությոնը, դրամական ծանր կացությունը, քայքայված առողջության խանգարումը եւ հետզհետե ծանրանալը, սակայն չէի կարող երբեք ակնկալել, որ նա այսքան վաղ ու անակնկալ կարող էր բաժանվել մեզնից եւ ընդմիջտ մեկնել, որովհետեւ տակավին երազանքներ ունեինք ազատել զինքն այդ նեղ վիճակից եւ դժոխային կացությունից, որին էր ենթարկված Բելգիան գերմանացիների ձեռքով գրավելուց հետո⁶:

Եւ ապրեցի օրեր ու օրեր մի նոր անձնական կյանքի, Հոյսերի ու երազանքների: Սակայն անողոք մահը Հնձեց տարավ յուր եսական Հոյսերի ու երազանքների գրական դաշտի հասուն, գունազեղ ծաղիկները, որոնք փնջելու, ի մի բերելու գեղեցիկ օրերն էր ապրում վերջին տարիներին⁷: Նրա մահը անդունդ գլորեց մեր այնքա՞ն բաղձալի ակնկալությունները ապագա Հոգեկան կյանքի, եւ մի նոր՝ թավշե մշակույթի դաշտ մտնելու մեր երազանքը, այստեղ՝ ազատ Ամերիկայի Հողում, մեր մատաղ սերնդի նոր Հայրենիքում, նոր աշխատանքներ կերտելու մեր երազանքը:

Եւ այս բոլորն անհետ կորան: Ադոնցը ընդմիջտ մեկնեց. օգտակար լինելու իր պատրաստակամ Հոգին հեռացավ մեզնից, որովհետեւ Հայ Ժողովրդի Համար տակավին գործնական է ազգային՝ «գնա՛, մեռի՛ր, արի սիրեմ»-ը:



Ճեմարանի շենքը դրսից և ներսից 1880-ականներին



Ն. Ադունցը ճեմարանականների հետ
(նստած, ձախից առաջինը)



Տ. Տիրայր վրդ. Տեր-Հովհաննիսյան

Հնարավոր չէ՞ր արդյոք սիրել զինքը, գուրգուրալ յուր վերա նախքան Հնձող, խաթարող մանգաղի Հարվածի իջնելն այն արթուն Հոգու տեր անձի վերա, որի զվարթուն սիրտը, միտքը՝ գիտական այնքան առատաբեր գանձերով օժտուն, դեռ երկար կարող էր մեր Հոգեւոր կյանքի ու մշակութային դաշտի մեջ այնքան բերրի սերմեր ցանել, ատող ու զեղուն Հունձքի անխաբ Հույսերով՝:

Քա՜նի Ադոնցներ ունենք, որոնց կյանքի գնահատությունը անկարող եղանք ըմբռնել, արժեքավորության վերածել եւ յուր կյանքի վերջալույսի օրերը դարձնել Հուսալից արշալույսի առավոտյան ղողանջի երգ ու Հույզ: Դժբախտաբար այդ է Հայ ժողովրդի վերաբերումը յուր Հնորձալի զեղուն մտքի, անհատնում կարողության ձիրքերով օժտված զավակների նկատմամբ:

* * *

Ս. Էջմիածնի Գեորգյան Հոգեւոր ճեմարանի գոյությունը Հայ երկրի սրտում պատմական մի մեծ շարժման նախակարապետն էր: Գեորգ Դ. -ի էական նպատակն էր եղած՝ տալ ուսում եւ գիտություն իր ժողովրդին եւ այդ ուսումն ու գիտությունը մատակարարել **կատարելապես ձրի**, առանց թռչակի պարտադրության: Ճեմարանի վարչությունն ինքն էր ընդառաջ գնում յուր սաների ուսման ծախսին: Դժվարություններ չկային՝ Հարթված էին, միայն մի պաշանջ՝ ուշիմ, մոռացի, քաջառողջ եւ սովորելու ընդունակությամբ սատարուն թեկնածուներ ունենալով...

...Սեպտեմբերի առաջին օրերն էին 1882 թվականի: Ճեմարանի Հանդիսարանի Հարավային պոչնաղարդ Հանգրվանների տակ կեսօրվա դասերից Հետո Հանգստյան պաշին խմբված մի խումբ «նորեկներ», ճեմարանի նոր Համազգեստներ Հագած, տոնական օրերի տրամադրությամբ եւ ճեմարան ընդունված լինելու անհուն գոհունակության Հույզերն իրենց դեմքերին ու աչքերի մեջ ճառագայթելով, առավոտյան քնից արթնացած, ճնճումնների անմերջ աղմուկ-ճուլղոցումով միժոռ, ցատկոտոռ, խոսում էին: Նրանք իրենց երջանկության գինով արբեցած չէին իսկ նկատում, թե մեծերը, կամ ճեմարանի լեզվով «եղբայրները» ժողոված Հանդիսարանի գմբեթաձարկի տակ Հետաքրքրությամբ գիտում էին այդ նորեկներին, մասամբ տարված իրենց անհատական Հուշերով, երբ իրենք եւս նորեկներ էին եւ մասամբ տարված այդ խմբի անհատ նորեկների անհատականությամբ, թե ի՞նչ են, ի՞նչ կարող են լինել եւ որը «ամառը պիտի լինի», որը «շալաքուլա պիտի գուրս դա»:

Խմբի մեջ մեկը նորեկներից, աշխույժ, բաց ու լայն ճրագող աչքերով, կլորիկ ու կարմրիկ այտերով, ամելի կարճահասակ ու նրբակազմ, քան ուղիղ ու թիկնեղ, տեղը Հանգիստ չգտնող, անդադար տեղից տեղ սաճող ոտքերով, աշխույժ ու առանց տատանումի պատասխաններ էր տեղում տեղացող Հարցերի դեմ ու ինքն եւս անմերջ Հարցեր շարտում շուրջն եղածնե-

րին ու աչքի էր ընկնում իր սիրուն դեմքով, անուշ ժպիտներով ու հրացայտ հայացքի շեշտակի նետերով:

Ձեռքին բռնած էր մի ողկույզ խաղող, որ անդադար օրորում էր բթամատի եւ ցուցամատի ամուր աքցանի մեջ, ժամանակ չունենալով ոսկեգույն հատիկները բերանը տանելու, որովհետեւ այդ փոքրիկ բերանը զբաղված էր հարցերի պատասխան տալով եւ հարցեր տեղալով: Ողկույզը՝ չամչենի, դեղին-սաթ հատիկներով, աջ ձեռքից տեղափոխեց ձախի պահպանության, որպեսզի աջը գործադրե ասածներն ավելի եւս պնդելու, շեշտ ու համարձակ շարժումների անդադար օրորումներով:

Չախ ձեռքը բարձրացրած պահին, երբ տարված էր աջն օգնության կանչելու՝ իր ասածը հաստատելու, մի այլ ձեռք մեկնվեց եւ ողկույզը թռավ բթամատի եւ միջնամատի աքցան պրկումից:

Մեկ րոպե փոքրիկը շմամ եւ չիմանալով, թե վեճը շարունակեր, թե խաղողի հետեւից վազեր, շփոթվեց, բայց նորից ինքն իրեն գտնելով, խոյա-ցավ համիշտակվող ձեռքի դեմ:

-Է՛, էդ ի՞նչ ես անում, խաղողս հո՞ւր ես տանում,-ասելով:

-Է, բալաս, տեսնում եմ, որ ձեր գեղումը խաղող չես տեսել, ուտելն էլ չես իմանում, դրա համար «չուտողի մալը, ուտողին հալալա», - ասաց մյուս աշակերտը, որ հինգերորդ դասարանի հայտնի երգիծաբան Ստեփանն էր, եւ ձեռքը վեր բարձրացնելով նորեկ փոքրիկի հասակի հասողության սահմանից շատ վեր դարձրեց:

-Բալաս-բալաս չկա, խաղողս տուր, թե չէ դյուզըմ՝ ըս...

-Թե չէ, ի՞նչ...

-Քե ասըմ՝ ըմ տու, թե չէ կը թխիմ պարանց կը քըցեմ...(= թե ոչ կը զարկեմ, գետին կը գլորեմ):

Եւ այս խոսքերն ուղղված էին իրենից շատ ավելի բարձրահասակ, տարեց մի աշակերտի:

Ստեփանի տրամադրությունն ավելի բարձրացավ եւ ծիծաղելով ասաց.

-Տո, ես ծիծիկոն ո՞վ է բերել...

-Ես ծիծիկո չեմ: Թե ես ծիծիկո եմ, դու ի՞նչ ես..., գիտե՞ս, ինչ ես:

-Ի՞նչ:

-Պառավ ծերոն...

Հանդիսարանի տակ հավաքված խմբի մեջ ծայր տվեց հոմերական ծիծաղի ալիքները, որ քանի գնաց լայնացավ, տարածվեց, մինչեւ որ զանգակի ձայնը հնչեց, որ ամենքին դասի էր հրավիրում:

Այդ րոպեից Ստեփանին կապվ «Ծերոն» [= ծեր, ծերունի] մակդիրը, իսկ նորեկ փոքրիկին՝ «Ծիծիկո» կոչումը: «Ծերոնը» ժպտալով հանձնեց Արարատյան դաշտի արեւի ջերմությունն իր հատիկների մեջ ամբարած ողկույզը «Ծիծիկոյին» (=ծծկեր, փոքրիկ, *mignon*) եւ ճեմարանը մտավ իր լրջության պատյանը:

Այդ «Ծիծիկոն» Արմենյաց աշխարհի Բռնակոթ դյուղի Ադոնց Գեւորգի տղա Նիկողայոսն էր, որ արձանագրվեց ճեմարանի մատյանի մեջ՝ «Նիկո-

ղայոս Տեր-Ավետիքյան. աշակերտ Ա. դասարանի»։ Եւ Տեր-Ավետիքյան Նիկողայոսը մնաց Մայր Աթոռի ճեմարանի Հոգեւոր ինստիտուտի տակ՝ մնալով առատապէս այն առատաբաշխ աղբյուրից, որ յուր ապագա ասպարեզի ուսուցիչն էր։

Ասացի, որ Տեր-Ավետիքյանը ուշիմ էր ի բնէ, ջանասեր իր Հակոբանով, Հետամուտ իր ուսման առարկաներին իր ներքին պաշտօնների դրդանով, օժտված աշխույժ մտքով եւ դուրսըմբռնելու կարողությամբ, այնպէս, որ շատ չանցած նորեկ Տեր-Ավետիքյանը ո՛չ միայն գրավեց ուսուցիչների ու շահագրգիռները, այլեւ սիրելի դարձավ իր ընկերներին, որոնց մեջ ամենից փոքրն էր, թե՛ տարիքով եւ թե՛ Հասակով։ Եւ այդ աշխույժ, հրաշարժ, փոքրիկ, ճկուն մարմնի մեջ նստած էր ապագա լուրջ ու Հետախույզ մտքի գիտնականը։ Իր ընկերների սիրելին էր, ոչ միայն իբրեւ ճարպիկ, ամեն ծակ ու ծով մտնող «ծիծիկո», այլեւ իբրեւ պատրաստակամ օգնող ընկերներին՝ դասերին, դժվարին պարագաներին։ Կարճ ժամանակի մեջ իր փոքր շրջանի՝ դասարանական միջավայրի մեջ, ձեռք բերեց Հեղինակություն, գերակարգություն։

-Ծիծիկո, էս ի՞նչ է...

-Ծիծիկո, էս ի՞նչպէս է...

-Ծիծիկո, էս ի՞նչ է նշանակում...

-Ծիծիկո, էս ինչպէ՞ս անեմ։

Եւ ամեն մեկին իր բաց սիրտը, Հոգին, պատրաստակամ Հակոբան պատասխան էր տալիս, լուծում ընկերոջ առաջ դրված անլույծ համարված հարցը՝ պարզելու հստակ բացատրությամբ, ամենքին գոհ պահում։ Ինքն եւս՝ գոհ, չզգալով անգամ, թե դժվար կացությունից էր հանում իրեն դիմողին։

Ճեմարանի մեջ աշակերտների դասերի պատրաստության ժամերը 4½ ժամ էին երեկոյան։ Ժամը 2-ից մինչեւ 4½-ը աշակերտներն ազատ էին՝ նախընտրելով խաղերի, զբոսանքի, ծաղկանոցների մշակություն։ Վաղելու, ցատկելու, ծառեր մագլցելու կամ հանգիստ շրջապայելու ճեմարանի ընդարձակ պարտեզի եւ կամ ճեմարանի մեծ եւ փոքր՝ հարավային ու հյուսիսային բակերի մեջ։ Եւ այդ ազատ ժամերին աշակերտությունը տարված էր ամբողջովին իրենց ազատ ժամերն, ըստ ամենայնի, օգտակար դարձնելու բնական միտումով։ Եւ այդ բոլորի մեջ «ծիծիկոն» մաս ուներ եւ բաժին, որին նախընտրում էր իր պատանեկան եռանդի ամբողջ թափով։

Ասկայն Հաճախ փոքրիկ Նիկողայոսը սիրում էր մեծերի, «եղբայր»-ների շրջանի մեջ տեղ գտնել, մանավանդ, որ Համոզված էր, թե «եղբայր Նիկողայոսը»՝ մի այլ բռնակոթից, իր բնական թեւարկուն, պիտի սիրով ընդունէր նրան եւ կարեւոր պարագաներին իր պաշտպանության տակ առներ։ Այդ «եղբայր Նիկողայոսը» Բռնակոթի Պետրոս Բեկ Մելիք-Թանգյանի որդին էր (ապագա Ներսէս արքեպիսկոպոս Մելիք-Թանգյանը՝), որ ճեմարանի շրջանի մեջ Հայտնի էր «Թանգի» կամ «Հոգուրու» մականորով, որը մի առանձին սեր ու գուրգուրանք ուներ իր Համադյուղացի ուշիմ ու

սրամիտ պատանցակի նկատմամբ: Եւ եթէ «եղբայր Նիկողայոսը» չլինէր անդամ, այնտեղ կային «եղբայր Դավիթը»՝ շինուհայրցին, «զկեռ» մակահունով՝ իր կարճ ու կլոր, անդադար շարժուն ու անսպառ եռանդի Համար: Կամ «եղբայր Տիգրանը»՝ տաթեւացին, («Գոգո» մականունով, իր նուրբ դիմագծերի եւ աղջկանց շարժումներով՝ խոսելու ձեւով): Կամ «եղբայր Փարամազը» («Հուրամազ» կամ «Գող Վասիր» մականունով, իր աշխույժ, Հանդուգն, անհանգիստ բնավորության պատճառով, մեկն ապագայի քաղաքական Հերոսներից, Կովկասի կառավարչապետ իշխան Գոլիցինի դեմ կատարված մահափորձի մասնակիցներից, Թիֆլիսից Կոջոր տանող ճանապարհի վրա¹²): Ու կամ «եղբայր Մարտիրոսը»՝ արծաթահիւսն, («սպլին», «spleen» մականունով¹³, որի երեսին ժպիտ չէր խաղում երբեք): Եւ եթէ այդ Համիրականներն իսկ չլինէին, կային շուրջը «մեծերը»: Լսարանների¹⁴ ուսանող աշակերտներն իսկ սիրով էին ընդունում «Ծիծիկոյին» իրենց մեջ, Հարցեր տալով այլեւայլ ինդիւիդուալ մասին եւ սիրով լսում նրա պատրաստաբան պատասխանները, որ միշտ էլ աշխույժ ծիծաղի ու ինդուստրիալ նյութ էր նրանց Համար, իսկ փոքր Նիկողոսի Համար զարմանքի նյութ, թէ ի՞նչ կար ծիծաղելու այդքան բնական պատասխանների մեջ:

Եւ երբ շատ նեղն էին ձգում նրան ամեն կողմից տեղացող պատասխաններով, մեծ «եղբայր Նիկողայոսը» Հարեհաս Սբ. Սարգսի նման վրա էր Հասնում ու ազատում նրան, ձեռքից բռնելով եւ տանելով այդ «դոն-գինների» (խենթերի) եւ «խալոուրանների» (անարժեք) միջից Հանելով: Եւ մեծերը, Հոգատար մեծերի զգացումով, Հարցնում էին.

-Ծիծիկո՛, շատ նեղացրինք:

-Երբեք, ինչո՞ւ պիտի նեղվեի...

-Նորից կգա՞ս...

-Այո՛, եղբայր...այո՛, անշուշտ:

Եւ փոքր Նիկողոսի Հեռանալուց Հետո «մեծ»-երը մտքերի փոխանակություն էին կատարում, եւ իբրեւ Հետեւանք, եղրակացնում էին.

-Այս փոքրիկից մեծ մարդ պիտի դուրս գա:

Եւ այդ եղրակացությունը սխալ չէր: Կորյունի մեջ առյուծն է նստած, իսկ արծվիկը՝ արծիւն է վաղվան: Եւ այդ արծիւն անգիտակ ապագայի նկատմամբ եղած այդ բարեգուշակ մարդարեություն, Հանձնվում էր խաղընկերներին՝ կամ հյուսիսային բակի լայն սալարկի վրա վեգ խաղալու եւ կամ Հարավային բակում գերի-գերի խաղով տարվելու:

* * *

Ճեմարանի կյանքի մեջ «սերտողության ժամերը» նույնքան սրբազան պաշեր էին, որքան դասերի ժամերը: Եւ եթէ այս վերջինները մտքի սնունդ Հոգեւոր «կաթի ջամբան» (= կերակրման) պաշերն էին, որի մատակարարները՝ ճեմարանի նույն ժամանակի ամենից պատրաստված եւ կարող ուսուցիչների խումբն էր (Ս. Պալասանյան՝ «Հայոց պատմության»

այդ անդուգական հմայիչ պատմիչը եւ ուսուցիչը⁵, Կ. Կոստանյանց՝ «Հայոց լեզվի եւ գրականության» հմուտ, առիւնքնող հեղինակավոր աղբյուրը⁶, Փ. Վարդանյանց՝ «Հին ու նոր պատմության», «Ընդհանուր գրականութեան», իսկապէս անապառ գիտության եւ հետաքրքրության մղող վճռակը⁷, Նիկ. Խոսրովյան՝ «Ռուսաց լեզվի եւ գրականության» առատահուն ակնի ուսուցիչը⁸, Սեդ. Մանգինյան՝ մանկավարժության, փիլիսոփայութեան առարկաների վարպետը⁹, Արշ. Նաճապետյան՝ տիեզերագիտության, բնալուծության չորուցամաք դասերը բանաստեղծական շնչով ու գիտական նորեն հմայիչ բացահայտողը¹⁰, Ա. Սիմոնյան՝ ժվաբանության, գրաձաշվի, երկրաչափության, եռանկյունաչափության, բարձր մաթեմատիկայի տարրերի գիտությունը հետաքրքրությամբ վարող-ավանդողը¹¹ եւ այլն): Ահա այս կարող ուսուցչական խումբը գիտեր այդ կաթը ջամբել ուսման ծարավ մոգներին ու հոգիներին՝ «դասերի ժամին»: Այդ ժամերի ջամբաճն ու տվածը յուրացնելու, սեփականություն դարձնելու, ամբարելու եւ շտեմարանի զենքերը պատրաստելու պաճերը «սերտողության ժամերն» էին:

Ճեմարանի երկրորդ հարկի հյուսիսային երկու մեծ սրահները «սերտարան»-ներն էին: «Սերտողության ժամի» զանգակը հնչելուց հետո ճեմարանի աշակերտության մի մասը՝ Ա., Բ., Գ. դասարանները, ժողովվում էին սրահներից մեկի, եւ մյուս մասը՝ Դ., Ե., Չ. դասարանների աշակերտությունը մյուս սրահի մեջ, իսկ լսարանցիները՝ իրենց լսարանների մեջ: Հագիվ երկու բոլե անցած, ամբողջ ճեմարանը խորասուզվում էր խոր լուծության մեջ, դադարում էր ամեն շարժում, տիրում էր մեռելային մի վիճակ՝ ձայն, շշուկ, խոսք, շարժում դադարում էր: Ամենքը նստած խոշոր գրասեղանների շուրջ՝ 20-ական հոգի, տարված էին միայն մի էական նպատակով՝ պատրաստվել հետեյալ օրվա դասերի պատրաստությանը, շարադրություն գրելու, խնդիրներ լուծելու, օժանդակ գրքերի ընթերցանության մեծ գործով: Ոչ դժ իրավունք ուներ շարժվել տեղից, խոսել իր մոտ նստածի հետ, նույնիսկ շշուկով: Նույնիսկ տետրակի թերթերը, գրքերի թղթերը թղթատելու պաճին իսկ ամենափոքր ձայն, շշուկ լավեր, հսկող վերակացուի անխելի քայլով մոտենալն ու ձեռքն աշակերտի ուսին դնելը մեկ էր լինում, մի պարագա, որ ամենամեծ ամոթանքն էր մեծի ու փոքրի համար եւ ամբողջ սերտարանի հուզված աչքերն ուղղվում էին խաղաղությունը վրդովելու անհանդուրժելի խանգարման հեղինակի վրա, եւ խեղճը չէր իմանում, որ ծակը մոտներ: Ինքնաարդարացման ամենափոքր իսկ փորձ՝ ո՛չ տանելի էր եւ ո՛չ ներելի: Ամենից մոտ ընկերը, առանց խղճահարության, դատապարտության քվե տալու պատրաստ էր իր ընկերոջ, որովհետեւ սրբազան լուծությունը, հոգեւոր մատակարարության պաճի վեհությունը խանգարված էր ի վնաս ուշիմ աշակերտի մոգի ծարավով տարված հոգու:

Բառարաններ, օժանդակ մատյաններ, տեղեկատու աղբյուրների գրքերը դարաված էին մեծ, լայն խեղանների վրա, որից օգտվելը պաճանջ էր, արտոնություն, իրավունք՝ առանց ուրիշի իրավունքը խանգարելու: Եւ այդ խոր, պատանեկան տարիներից պատրաստված գիտակցությունը

սովորույթային էր, որ այնքան շեշտված էր ձեմարանից ելած յուրաքանչ-յուր աշակերտի բնավորության մեջ: Եւ այդ աշակերտներից մեկը լինելով եւ Ադոնցը, նրա Հոգեկան ապրումների, ապագա գիտական պրպտոմաների Հաջողության Համար կատարյալ պահանջ էր այդ անպայման լուսվ-յան միջավայրը, որի բացակայությունը նրան ջղայնացնում եւ *hors de son assiette*-եր²² վիճակի էր մատնում եւ կյանքի շատ դյուրություններից իսկ զրկվելու պատրաստակամություն էր Հայտնում «անպայման լուսվյան» այդ դրության տեղ դառնալու Համար, թե՛ իր ուսանողական շրջանի, եւ թե՛ ուսուցչապետության կյանքի ժամանակը:

Ն. Տեր-Ավետիքյանը մնաց ձեմարանի ինստիտուտ, կրթության ու դաս-տիարակության տակ ամբողջ ինը տարիներ՝ լրացնելով դասարանական Ա.-Չ. շրջանը եւ լսարանական Ա-Գ տարիների բաժինը: Այդ ամբողջ տա-րիների ուսանողական շրջանի մեջ նա մեկն էր իր շրջանի եւ ձեմարանի աշակերտության անդամներից: Սովորում էր առանց ծանր տքնության, առարկաները յուրացնում էր մեծ դյուրությամբ, առանց քրտնաջան Հո-գեմաշուքի, առաջիններից էր եղած դասարանի մեջ բոլոր առարկաներից: Մասնավոր սեր ուներ դեպի լեզուները, մատենագրության պատմությունը, քննական-Հետախուզական վերլուծությունների դասերը՝ գրականության ու պատմության, ինչպես եւ այլ եւ այլ շրջանների նկատմամբ: Տարված էր բանաստեղծության ճյուղում, ուր իր երիտասարդ, քնքուշ, դյուրահաղորդ Հոգին անվերջ ասպարեզ էր գտնում Հետեւելու, վերանալու, փոքր ու Համա-ռոտ ակնարկներից բանաստեղծի ապրումներն ու երազանքները, Հոյգերն ու երազանքի աշխարհը կռահելու: Հեռու չէր նաեւ իր տուրքը վճարելու մոտանքին եւ Հաճախ գեղեցիկ փորձեր էր անում Պառնաս բարձրանալու եւ այնտեղ ժամերով անձնատուր լինել իր ներքնաշխարհի ապրումներին: Սակայն չափազանց նուրբ քննադատի Հոտառությամբ ժպտուն, իր գրած-ները պահում էր իբրեւ գաղտնաշխարհ եւ շատ սակավ մտերիմները ծանոթ էին նրա այդ Հակման:

Փոքր տարիքից սկսած նրա մեջ զարգանում էր քննադատական ոգին՝ ոչ բծախնդիր՝ *pedant*, քննադատի չափանիշով, այլ լայնախոհ, պատմական տվյալների Հիմքով առաջնորդվող ոգով: Հայոց պատմության շրջանները նրա Համար ոչ միայն պարզ, ուսանելու պատեհություններ էին, այլ իրա-կան Հոգեկան-մտավոր ապրումներ, որոնց մեջ Հաճախ տեսնում էր մի նոր գիծ, որ ընկերների աչքից էր խուսափած: Եւ այդ գիծն էր, որ զարգացավ աճեց եւ դարձավ նրա ապագա պատմական-կենցաղական-քաղաքական ուսումնասիրությունների լայն դաշտ, ուր նրա Հոգին սավառնում էր անց-յալը Հիրավի ապրողի թոփաքով, անվրեպ տեսողությամբ օժտուն, ուր ամե-նից փոքր մի պատմական իրողությունը, ակնարկ իրերի վրա, Հասկանալի միայն ժամանակակից մարդու Համար, պատճառ էր դառնում, որ իր գրի-չը՝ նրա ստեղծագործ Հոգու Պեզասը նստած, պարզեր պատկերներ մեկը մյուսից ավելի գրավիչ, ոչ իբրեւ բանաստեղծական քննյքի արտադրութ-

յուն, այլ ճարտար արվեստագետի, անլրեպ վերականգնում անցյալի ավեր շինվածքն ու կերտվածքն՝ իրենց բոլոր ճոխությունքն էլ հմայքով:

Բնավորությամբ համեստ էր, ընկերական, հաղորդակից, հարաբերությունների դժվարությունները դյուրավ լուծող ու հաշտեցնող, ուրախ ու դյուրահաղորդ, կատակաբան էլ կատակներ սիրող, հեռու հաղկահաղկի պես ուռչելուց, որովհետեւ ինքն ավելի ընդունակ էր եւ ավելի ճոխացած մտավոր պաշարով եւ ինչպես ձեմարանի նորնախիջեանցիք էին ասում՝ «գուռելի պես չէր ուռչում» եւ հաճախ ինքն էր ծաղրում այդպիսիներին Հովհաննես վարդապետի «Տաղ թռչնոց» անունով տաղից երգելով՝

Գուակալ Հաւըն կարմիր կատար
մէջ փողոցնուն թեպրով խայտար,
Պա՛հ մի քրքրէր եւ դիզնայր,
Հետէն բացուէր եւ սուս չմնար:

Ուներ հաճելի մեղմ ձայն, դրավիչ ու հանդուցիչ: Փոքր ժամանակից «մեծ եղբայր»-ներն էին երգել տալիս նրան հաճելի ժամանցի համար դուրսը՝ ձեմարանի պարտեզի, Ղուի այգու եւ անտառի Հովանոտ ծառերի տակ ապաստանած: Երգում էր մեղամաղձիկ, սիրտ ճմլող, ինքնուրույն մի գրավչությամբ, որի ժամանակ նրա պայծառ, վճիտ, միշտ փայլուն եւ շողերով առ լի աչքերի մեջ երեւում էին թախծի մնաղոք որդի առաջին նշանները, մանավանդ երբ երգում էր Ղարաբաղի «Բայաթին», «Շիքաստին», «Բայաթի քուրդը», երբ նրա Հոգին թափառում էր հայրենի ձորերում, անտառներում եւ լեռների վրա եւ հանկարծ նրա վճիտ ձայնը սկսում էր բեկբեկվել, եւ նրա՝ հեռու հորիզոններին սեւեռած աչքերը տակավ առ տակավ պատվում էին վշտի քողով, եւ նրա աչքերն սքողվում էին խոր թախծի վարագույրով, եւ հանկարծ աչքերը լցվում արցունքի փայլակ կայլակներով: Եւ հանկարծակի տեղից ցատկում էր եւ արագ, հալածվող եղջերուի պես փախուստի դիմում եւ ապավինում Ղուի այգու ընդարձակ որթատունկի ծմբերից մեկի տակ թաքնվում:

Մեղամաղձիկ, թախծոտ երգի այդ գիծը միշտ էլ մնաց նրա Հոգու մեջ եւ դարձավ մի ինքնուրույն, բնորոշ գիծ նրա ամբողջ կյանքի մեջ: Մի ներքին անլույծ դադսնիք միշտ էլ հետապնդող փերու նման թաքնված էր նրա ներքին աշխարհի մեջ եւ այդ բիծը մնաց նրա դեմքի բնորոշ խաղերից մեկը: Թախծի անորոշ, հազիվ նշմարելի մառ ու բալ (=մշուշ) անբաժան էր նրա աչքերի խորություն մեջ, որ հայելին է մեր ներքնաշխարհի: Հոյզը, աննշմարելի օտար աչքերից, իսկույն այլալվելու իր առանձնահատուկ գիծը, որ այնքան առանձնահատուկ շնորհալիությունն էր շնորհում նրա դեմքին նրա հասուն տարիքի շրջանին, եւ որ այնքան գրավիչ էր դարձնում նրան՝ Լասարակական նեղ, մտերմիկ շրջանի պա՛հերին, այնքան նրբին ու կշռված հարաբերության մի ոստայն հյուսում իր շուրջը, իսկապես գնահատված, մանավանդ գեղեցիկ սեռի կողմից, նրա խոսքը դարձնում էր տպավորիչ հայացքը՝ գրավիչ, ժպիտը՝ առհնչնող, բնավորության (hobitët-ի) այդ գիծը տնական միջավայրի շրջանից:

* * *

Ճեմարանի այդ շրջանի մեջ դասական լեզուներ չէին ավանդվում: Այդ առարկաները մոտան ավելի հետո: Այդ օրերից իսկ Նիկողայոս Տեր-Ավետիքյանը զգում էր իր մեջ իր ապագա կյանքի ուղղության հետեւելու հակումն եւ հաճախ էր դանդաստվում, թե պարսկերենի եւ տաճկերենի կողքին ինչո՞ւ պիտի չդասավանդվեին եւ լատիներենն ու հունարենը, որոնցից մանավանդ վերջինը, որ այնքա՛ն խոր ազդեցություն էր ունեցած հայոց լեզվի քերականության եւ շարահյուսության կազմի վրա՝ մի կողմ թողնելով բառամթերքի կազմը:

Եւ դեռեւա ճեմարանի 4-5-րդ դասարանների մեջ Նիկողայոսը սկսեց ազատ ժամերին սովորել երկուսն էա՝ ավելի ժամանակ հատկացնելով հունարենին: Բայց ինքնուսուցման եղանակը նրան չգոհացրեց եւ մտադրվեց ճեմարանն ավարտելուց հետո պատրաստվել ռուսական գիմնազիայի քննության, որովհետեւ վերջնական իր որոշումն էր մտնել համալսարան եւ հետեւել Արեւելյան լեզուների գիտության:

Ճեմարանի լսարանական բաժինն ավարտելուց հետո՝³ նա անցավ Թիֆլիս՝ պատրաստվելու գիմնազիական քննության: Գեւորգյան ճեմարանը, թեեւ իր գիտության չափով շատ ավելի բարձր էր ռուսական գիմնազիաների տված ուսման ծրագրից, սակայն եւ այնպես ճեմարանի դպրոցական շրջանն ավարտողները, որոնք ուսման չափով համահավասար էին գիմնազիական գիտության, պետական օրենքով իրավունք չունեին, իբրեւ իսկական ուսանողներ, համալսարան մտնելու: Նույնիսկ լսարանական մասնագիտական բաժինն ավարտողները զրկված էին այդ իրավունքից եւ կարող էին համալսարան հաճախել լոկ իբրեւ ազատ ունվդիկներ, չնայած, որ գերմանական համալսարաններն անխտիր ընդունում էին Գեւորգյան ճեմարան ավարտողներին, նույնիսկ դպրոցական շրջանն անցածներին՝ իբրեւ իսկական ուսանողներ:

Ադոնցը, անցնելով Թիֆլիս, կարող եղավ մի տարվա մեջ պատրաստվել եւ պետական գիմնազիայի քննությունները հանձնել՝ կրելով նյութական ծանր նեղություններ: Բայց նա վճարողներից չէր՝ նեղությամբ, չարչարանքով, զրկանքներով, սակայն ժպիտը մշտապես շրթունքներին, դժվարությունները ոտքի տակ տալով, կամ ինչպես ինքն էր սիրում արտահայտվել՝ «քարին քացի տալով», ձեռք բերեց ռուսական գիմնազիայի ավարտական վկայական: Եւ այն, ինչ որ այնքան դժվարին էր թվում նրա աչքին, ո՛չ ուսման դժվարությունները հաղթահարելու տեսակետից, այլ չարքաշ կյանքը կրելու առաջ խոնարհվելու կքոմոլ, այժմ՝ այդ բաղձալի վկայականն իսկ ձեռքն անցնելով, զգաց, որ իր առաջ ծառացած է մի շատ ավելի ծանր ինդիք, որի հաջող լուծումից էր կախված իր ապագան, իր երազանքների իրագործումը եւ կյանքի վերջնական նպատակին հասնելու միջոցներ գտնելը:

Այդ հարցը՝ թույլի ունենալու խնդիրն էր: Մի հարց, որ այդ օրերին չունեւոր տան զավակների համար դյուրութեամբ չէր վճռւում...

* * *

Ճեմարանի մեջ, թեեւ ես դասարանու ու տարիքու ավելի բարձր էի եւ տարեց⁴, սակայն միշտ էլ ներքին բարեկամութեամբ կապ կար մեր մեջ Հովանավորի ու Հովանավորյալի նախնական շրջանի ժամանակ իբրեւ «եղբայր» եւ «ծիծիկո» եւ ապա իբրեւ ավելի մոտ հոգեկան կապերու իրար միացած ճեմարանցիներ, մանավանդ, որ կար նաեւ Հայրենակցական կապերի մագնիսական ուժը, որովհետեւ ծիծիկոն «Սարեն-էն-դոլեցի» էր (=Արեւիքից, Զանգեզուրի գավառից), ինչպէս սովոր են անվանել զանգեզուրցիներին բուն զարաբաղցիները: Այդ անվանակոչման՝ «Սարեն-էն-դոլեցի» (=լեռան մյուս կողմից) մակդիրի մեջ կար արհամարհական մի շեշտ, վերելից նայելով մի հոխորտանքի գիծ, որովհետեւ առհասարակ զանգեզուրցիներն ավելի կոշտ էին ու անտաշ, դժվար հղկվող մի քար եւ քաղաքավարութեան շիման շատ դյուրաւ չեն թարկվող տարրեր, քան բուն զարաբաղցիները: Զարաբաղցիների բնավորութեան մեջ շատ ավելի էր դրված դյուրաւ հղկվելու, միջավայրին հարմարվելու եւ կոշտութեանը աստիճանաբար մոռանալու ունակութեանը, որի այնքան ցուցադիր օրինակներն էին Բաքվի եւ Թիֆլիսի Հայ ընտանիքների այրերը՝ հարստութեան, դիրք ձեռք բերած ներկայացուցիչներ, ուր զարաբաղցին եւ սարեն-էն-դոլեցին իսկույն աչքի էին ընկնում: Այսպէս էին ոչ միայն միջավայրի անմիջական ազդեցութեան ներքո շիման ու հղկումի ենթարկվածները, այլ նույնիսկ բարձրագույն կրթութեան ստացած, հասարակական աչքի ընկնող դիրք ունեցող անձերը, որոնց վրա գիտութեանը, իր ուսման կնիքը դնելով հանդերձ, սակայն նրանց վարվելու, հարաբերվելու եղանակը միշտ էլ *social lapsus*-ի զգալի հետքեր էր կրում (որի ամենից ավելի աչքի ընկնող ներկայացուցիչ կարող էր համարվել Հանգուցյալ Մեսրոպ Նախկին արքեպիսկոպոսը⁵): Մի գեղեցիկ բացառութեան էր կազմում ճեմարանի «Սարեն-էն-դոլեցիների» մեջ Նիկողայոս Տեր-Ավետիքյանը՝ նուրբ կազմվածքով, գրավիչ ժպիտով, առինքնող Հայացքի սուր ու թափանցող աչքերով մանր ու սեւեռուն, ոչ խուզարկու, հետաքրքրվող, հոգու գաղտնիքները կորզելու ցանկութեամբ: Նրա Հայացքը ավելի բարեկամական ոգու մի Հայելի էր, որին չպատասխանել նույն Հույզ ու կապերով հարաւոր չէր: Եւ երբ երբեմն մոխրի տակ անթեղած «Սարեն-էն-դոլիցն»-ովի ծայրերն էին երեւում, ես կատակով «ծիծիկոյին» հիշեցնում էի իր «ալախաթունի պողերը» (=խիտնջ, *limacon*, *snail*⁶), իսկույն կարմրում էր, կծկվում եւ գրավիչ աչքերի խոնարհումով լռիկ ներողութեան Հայցում:

Ճեմարանից ելնելուց հետո ես մեր հարաբերութեանները մնացին այն մտերմիկ կապերը, որի շրջանին ես նրա համար դարձա «ռաբբի», իսկ ինքը

միշտ էլ մնաց «ծիծիկո» փաղաքուշ մակդիրի տակ ապաստանած, որի մեջ կային այնքան գեղեցիկ հուշեր անցյալի:

Եւ մի օր Հանկարծ Թիֆլիսից ստացա մի Հռաակտուր նամակ՝ ուղղված իր սիրելի «ռաբբին», որի մեջ պարզել էր իր ջերմ ըղձանքը՝ միջնորդել Ա. Մանթաշյանին, որ նա իր թոշակավոր սաների շարքի մեջ առնէր իրեն: Մանթաշյանի Հետ Հանդիպած էի մի երկու անգամ, սակայն, կասկածելով, որ մի վարդապետի միջնորդությունը կարող էր կարեւոր դեղաճաք չլինէր Ադոնցին իր Հիւանդությունից փրկելու Համար, դիմեցի Աբգար Հովհաննիսյանին՝ ինդրելով նրա ազդեցությունը Մանթաշյանի վրա, որի Հաջող ելքի մասին կասկած չունէի: Այդ դիմանագիտական *monoeuvre*-ն Հաջողվեց եւ Ադոնցը՝ իբրեւ թոշակառու-սան Մանթաշյանի, 1894 թ. աշնանը մեկնեց Ս. Պետերբուրգ՝ մոտնելու կայսերական Համալսարանի Արեւելյան լեզուների դիտությանց բաժինը՝ արձանագրվելով Նիկողայոս Գ. Ադոնց (Տեր-Ավետիքյան ազգանունից Հրաժարվելով նա դիմազրիական իր վկայականն ստացաւ այդ անունով, որով եւ Հայտնի դարձաւ ապագային՝ Համալսարանային պատմական դիտության բնագավառում):

ԾԱՆՈԹԱԳՐՈՒԹՅՈՒՆՆԵՐ

1. Ն. Աղոնցի ծննդյան թվականի վերաբերյալ գոյություն ունեն տարբեր գուցումներ (1871, 1873, 1875), որոնք հետևանք են հենց նրա՝ տարբեր փաստաթղթերում տեղ գտած անճշտությունների: Սակայն, ինչպես գուցում է Բռնակոթի գյուղական ծխական մատյանը, այս շփոթը փարատվում է՝

« Ծնունդ- յունուարի 10, 1871

Անուն- Նիկողայոս

Անուանք ծնողաց- Գևորգ Առաքելյան

Դանա Ռոստոմբեկյան»

(տե՛ս ՀՀ Ազգային արխիվ, ֆ. 47, ց. 3, գ. 237):

2. Ալան Ֆրենսիս Բեկոն-փիլիսոփա, անգլիական մատերիալիզմի հիմնադիր, Անգլիայի վարչապետ:

3. Խոսրը Անգլիայի թագուհի Ելիզավետա I Թյուդորի (1533-1603) մասին է:

4. Պետր է լինի՝ 1561-1626:

5. Ն. Աղոնցը մահացել է 1942 թ. հունվարի 26-ին, Բրյուսելում:

6. Բեկոն ռազմակալվել է 1940 թ. մայիսի 28-ին: Հատկանշական է, որ նրբ օկուպացիոն իշխանությունները փորձեցին Բրյուսելի Ազատ համալսարան, նաև հայագիտության ամբիոն մտցնել գերմանացի պրոֆեսորներ, համալսարանական պրոֆեսուրան կտրականապես հրաժարվեց համագործակցել նրանց հետ, որի արդյունքում համալսարանը փակվեց, իսկ դասախոսական կազմը (այդ թվում նաև Աղոնցը) մնաց առանց աշխատավարձի:

7. Ինչպես վկայում են Ն. Աղոնցի մտերիմները (Գարեգին արքեպ. Հովսեփյան, Հովհ. Զավրյան, Ա. Չոպանյան և ուրիշներ), կյանքի վերջին շրջանում պատմաբանը հետամուտ էր իր ուսումնասիրությունները դասակարգելու, նորովի խմբագրելու և հատորներով հրատարակելու ծրագրին:

8. Ն. Աղոնցի վերջին օրերին ականատես Հ. Էսեկուլյանը հավաստում է, որ 1941 թ. ամռանը, նրբ պատմաբանը համեմատաբար իրեն լավ էր զգում, Բրյուսելի հարուստ հայրենակիցները նրան առաջարկում են տեղափոխվել Շվեյցարիա՝ բուժվելու, սակայն «ան շատ հպարտ էր նման առաջարկ մը ընդունելու համար» և մերժում է (տե՛ս Հ. Էսեկուլյան, Նիկողայոս Աղոնց. Տպավորություններ և հուշեր. «Երիտասարդ հայուհի», ամսագիր, Բեյրութ, 1950, թ. 8, էջ 18):

9. Տիրայր արքեպ. Տեր-Հովհաննիսյանի հուշերի հետագա հատվածը, որ նվիրված է Գևորգյան ճեմարանի կազմակերպմանն ու գործունեության առաջին շրջանին, լույս է տեսել «Էջմիածին» հանդեսի 2004 թ. նոյեմբերյան համարում, ուստի այստեղ զանց ենք առնում այն:

10. Ֆրանսերեն mignon նշանակում է գողտրիկ, քնքուշ, նուրբ, թուսերեն՝ хрупкий, нежный, որ կարող է համանիշ լինել ծծկերին:

11. Ներսես արքեպ. Մելիք-Թանգյան (1866-1948)-եկեղեցական, հասարակական-քաղաքական, մշակութային ականավոր գործիչ: Գևորգյան ճեմարանում սովորել է 1877-1886 թթ. ընթացքում:

12. Խոսքը հայ ազգային-ազատագրական շարժման ակնառի գործիչ, հնչական կուսակցության անդամ Մատթեոս Սարգիսյանի (1863-1915) մասին է, որը ճնմարանում սովորել է 1878-1883 թթ. ընթացքում:

13. Spleen- (անգլերեն)- մաղձ, ծանծրախտ: Այսինքն՝ պետք է, որ արծվանիկցի Մարտիրոսի մականունը լիներ մաղձոտ:

14. Ուսումնական ծրագրի համաձայն Գնորգյան ճնմարանում ուսումնառության տևողությունը ինը տարի էր, որից 6-ը՝ դպրոցական, իսկ երեքը՝ լսարանական բաժնում:

15. Ստ. Պալասանյանը (1837-1889) ճնմարանում դասավանդել է 1881-1889 թ. ընթացքում: Առանձնակի ազդեցություն է ունեցել Ն. Ադոնցի հայագրքների ու նախասիրությունների ձևավորման գործում:

16. Լ. Կոստանյանը (1849-1920) երկար տարիներ է դասավանդել ճնմարանում (1878-1891, 1894-1911): Այդ ժամանակահատվածում ընդհատումներով վարել է նաև տնայի պաշտոնը:

17. Փ. Վարդանյանը (1842-1916) ճնմարան է հրավիրվել 1881 թվականին:

18. Նիկ. Խոսրովյանը, բացի դասավանդությունից, վարել է նաև ճնմարանի տնայի պաշտոնը (1885-1886):

19. Ս. Մանդինյանը (1844-1915) ճնմարանում դասավանդել է 1881-1892, 1896-1900 թվականներին:

20. Ա. Նահապետյանը (1848-1906) երկար տարիներ վարել է Գնորգյան ճնմարանի տնայի պաշտոնը և միաժամանակ դասավանդել (1881-1882, 1886-1891):

21. Ա. Սիմոնյանը ճնմարանում դասավանդել է 1881-1895 թվականներին:

22. Hors de son assiette (ֆրանսերեն բառացիորեն՝ «փր ափսնից դուրս»):

23. Իրականում Ն. Ադոնցը ճնմարանի լսարանական բաժինը չի ավարտել: Ավարտական քննություններից ընդամենը երեք ամիս առաջ՝ 1891 թ. փետրվարի 1-ին, նա դիմում է ներկայացրել ճնմարանի տնայությանը ուսումնառությունը թիֆլիսի ռուսական 2-րդ դասական գիմնազիայում շարունակելու խնդրանքով, որը ևս հարգվել է [տե՛ս ՆՆ Ազգային արխիվ, ֆ. 312, գ. 1, բ. 123, թ. 18 («Յուզակ Էջմիածնի Հայկական հոգևոր ճնմարանի հետազգված սաների»)]:

24. Ն. Ադոնցը և Տիրայր Տեր-Հովհաննիսյանը Գնորգյան ճնմարանում միաժամանակ սովորել են 1882-1888 թվականների ընթացքում: Ճնմարանն ավարտելուց հետո Տիրայրն այստեղ դասավանդել է եկեղեցագիտական և աստվածաբանական առարկաներ (1888-1890), հետևաբար՝ Ն. Ադոնցը աշակերտել է նաև նրան: Ահա թե ինչու է նա Տիրայր վարդապետին դիմում «ռաբբի» անվանումով:

25. Նկատի ունի Մնարոպ արքևպ. Տեր-Մովսիսյանին (Մագիստրոս, 1865-1939), որը ծնվել է Ջանգեզուրի Ծիկահող գյուղում:

26. Limacon (Limaceous, Limacine) - խլսունջ, улитка: Snail (Gastropoda)- լորձնեխ, слизняк - կակղամաշկ կենդանի:

27. Աբգ. Հովհաննիսյան (1849-1904) - հրապարակախոս, թարգմանիչ, հասարակական-մշակութային նշանավոր գործիչ: